



田叔禾小集卷之十一目錄

男田

藝衡

私識

賦一首

詩六十首

五言古詩四十七首

七言古詩六首

五言排律七首

田叔禾小集卷之十二目錄

詩 一百四十八首

五言律詩 七十首

七言律詩 五十六首

五言絕句 四首

七言絕句 十八首

田叔禾小集卷之十一

錢塘田 汝成 撰

男 藝衡 私抄

賦 詩

南遊賦

歲次闍茂月旅夷則歷日戊寅七夕令節田子
將祗役桂林藐焉異域戒行李辭嚴君展瑩宅
謝姬姻供帳南浦弭楫西津迺喟然嘆曰迢迢
畏途險矣隘矣佻佻征夫塵矣憊矣夫運有窮

通事有順逆安土敦仁謂之迪吉故度德量能
中外以秩者君之制也委身陳力夷險無擇者
臣之義也猥經術之寡昧兮濫策名於盛時效
涓埃於一紀兮俶沿牒而登資王程檄其孔棘
兮誼不可乎稍留遂揚舲以邁往兮訊南紀而
遠遊闕庭闈之定省兮眷棗梓之綢繆雖慰親
以強笑哀憑心其曷瘳路尸饔而負米曾受杖
於耒瓜尊叱馭以馳阪嶠絕裾而忘家伊數賢
之異趣兮予惟三復乎白華景孔門之崇孝兮

何百行之能加陟五雲以騁望兮散予心之鬱
伊禹穴蔚其對矣兮微河洛而求思輯瑞帛以
會計兮防風後而蒙誅孔斥怪而不語兮胡辯
骨之專車俄瑤山之峯嶺兮突秋江之怒濤乍
翱翔以徐進終踈蹕以彌高束赭峽而旬磔薄
赤亭以消搖陵廣斥而雲布迫枝汜而熊咆來
不知其所吐兮去莫測其所韜將堪輿之噫吸
兮疇胥怒之能招降層岑而卽舸兮御魚浦之
緒風淹定山以回眺兮眄鳳嶺於冥濛旦予發

於浙汭夕倚權於桐廬軒文漣以淪茗茅翠荇
以爲茹山川鬱其盤飀兮信玄聖之儲胥攬予
纓之纒纒兮濯嚴光之靈瀨晤入幕而輸忱曾
不屈其鯁槩體肥遯以居貞處久約而能泰希
巢許之遐踪何狂奴之故態指太末以西邁兮
歷姑蔑之榛墟丁吳越之龍鬪兮悉率賦而從
之踐茹膽以勗恚媪持葛以作絲藉蠶種之夾
輔竟澡耻於會稽何六千之膚敏復假虹於妖
姬貴乎聖賢之持滿兮履薄冰以自持彼何怵

而淫佚兮少康祀其忽諸悵覽古猶未厭兮增
羈懷之末嘆泝行颯以催發兮紛不假乎盤桓
釋余撓於澱澣揔余轡於常山路威夷兮木杪
風飄蕭兮雲端感新秋之策策悲故國之漫漫
望玉斗之峩峩峯鷲鉛溪之修渚雲冉冉以歸吳
人棲棲而泊楚亂彭蠡之汪洋兮康卽歸其在
睹哂僞漢之草竊兮規潢池以跋扈 皇祖赫
以龍飛兮矇不肯乎爲所鼓蛙怒於鯨波灰萬
艦於一炬先扶搖以鷹搏後倉皇以鼠沮屬四

寓之承平兮杭一葦以安流帆翩翩兮賈客眾
濺濺兮漁舟蹇杜蘅兮幽淑狎鳧鴈兮中洲沐
膏澤而詠勤苦兮喟太息以夷猶會長風以鵠
舉聊戢翼於洪都肅南州之高士吊黃墟以束
芻蕃秉鈞而少通兮矯矯節於頽波旣下榻以
承間兮胡不規之以中和處明夷而用晦兮知
其無可柰也互標榜以危言兮亦吾黨之過也
誦古牒其多愍兮予姑順途以徜徉披劔池之
荒壤睇牛斗之餘光金川洌以維緩玉筥駿以

高驤慨神物之恍惚兮僊之跡復已渺茫握椒
醕而叩螺阜兮謁忠節之祠宮嘉趙宋之多士
兮每登庸乎茲邦文子褻然而首舉兮值宗社
之顛傾慟赤縣之草莽扶黃屋於滄溟靈亦知
天壤之不可支兮要弘長以爲正竭余力始就
繫兮濱九死而崢嶸誓成仁而取義兮佩聖訓
之孔明復靈歌以激烈兮涕淫淫其緣纓犯皇
恐余上泚兮亦靈顛沛之所履水瀉瀑以下瀨
兮擊危磯之齒齒類駢馬之騰波象潛牛之伏

渚沫沸沸兮霑衣風泠泠兮送予將感靈而助
予兮警予濟乎驚湍予既不難於利涉兮履習
坎而愈安晞度嶺之偃蹇兮路回回以造天石
側疊以霞駁木天矯以虬蟠憇中坐而神掉俯
浚谷以顛汗豁崇關以豁閭兮嚴不可乎徑度
通重海以來庭納八蠻之寶賦輦犀象而甌珠
翠兮歸上國而布濩嗟曲江之人傑兮煒相業
於開元關茲關以懷遠兮峻故里之藩垣衣冠
儼其世祀兮覽遺編而增欬賦白羽以寄諷兮

窺細德之險微予之言旣艱於納牖兮抱殷憂
於長離版上帝以喪亂兮悔違弼其何追乘凌
江而下遡兮接南海之洪波憶當年之浪跡兮
冒赫羲以流槎涉朱垠之浩沔跋赤嶠之嵯峩
疲精神於夙夜兮冀青衿之速化遵半塗而削
迹兮雖式穀其則那予亦知迂踈之爲患兮耿
憤世而嫉邪雖忤時以多口兮剖心腎其無他
掠端州以左轉兮訊孝肅之遺黎却片石而弗
橐兮孰貪泉之能淄潯江流離而東下兮蹇予

舟以薄磷梧山龍從以隗罪兮路陂陀而逾峻
逆離水以上浮兮入大荒之修垆山參差以繚
繞兮冗不知其所名峯刺天兮戟立灘濤石兮
雷轟霧霍霽以下浥雲滃渤以長蒸猩猿哀以
夜嘯虎豹群而晝行劃綠林以唐突兮孰有戎
之敢櫻何茲川之塞阨兮餘百里而無人心屏
營兮逾劇途邇迴兮益屯禹臍胝以荒度兮曠
戎索而弗理降芊楚以肇封兮輓筆籙以畧啓
王制闕而未被兮詎文德之能救忍羈旅以伶

傳兮惕二親之遺體超陽朔而北詣兮及桂林
之崇墉控五嶺之上游兮鎮百粵而爲邦洞重
闔以方軌兮壯屏翰之軍容其中則朱門赫赭
文薨鉦闕植戟鳴鐘 皇宗是國次則街衢弦
直閭閻蟬聯五方服賈列隊居塵扶輿毓秀紱
冕比肩於前則連山嶠崿界以重江醜清瀉濁
環陰抱陽經涂枝術貫穿越裳扼要領而南下
若建瓴於穹堂於後則培以衡嶽枕以堯阜綸
絡荆潭盤宗篤厚九疑繽紛以布翼三湘迴帶

以澄瀏於西則山奔水導分湘別灘發源月竈
莫測端倪引牂牁之洪派委下屬於番禺於東
則兩江迤邐與海通波飛艘絡繹鬻販魚鱉泮
散夷落北走湘湖述四郊而容與兮庶斯域之
可居鄉心愒其勃發兮衷眩曜其猶初佐旬宣
以賦命兮媿實約而名虛駑駘駕而戀櫪兮思
抱影於空廬遠父母而弗穀兮陟岵岵而漣如
孰有翼之可假兮願一覲夫里閭魂展轉以達
且兮宦情索其日淡乞骸骨而返初服兮䟽欲

陳而未敢擇官而仕豈臣心兮顧私衷之寡歡
傾肝膽而孰諒兮叢謗詈予以避難第抑志以
就列兮順時命而即安奉簡書以從事兮又怵
瘵曠之爲患亂曰大易有訓幼所懷兮消息盈
虛與時偕兮困亨而貞反諸已兮永終知救慎
厥始兮死生富貴命在天兮釋躁寡怨維末年
兮達人觀眇四海兮雄飛雌伏安以待兮欣
戚異感途所經兮歌以求言舒旅情兮忠信篤
敬慎身修兮雖之夷狄終無尤兮

詩

扈從西苑勸藉御幽風亭酺勞述頌

儀制時作

八政食斯首三農古所劭 明皇重本業天田

開禁郊房星正晨度新陽蒸土膏僊杏吐妍萼

崇蘭泛和颺蠢蠢蟄戶啓泯泯亘凌消覽彼物

色華平秩眷春朝馮相練嘉辰嗇夫獻靈苗朱

紘戾芳囿葱撻班神臯黜黜翠幕列奕奕青旒

搖三推先億兆百辟助劬勞行觀種稔凝佇想

粢盛饒騰車行烈醑舉燧升豐殺陳力經阡陌

酺勞飫芸蕘 皇恩一何裸歡聲雜簫韶春遊

媿夏諺載芟賡周謠願言勤祝史玉燭萬年調

扈從高禡壇訖事還御 重華殿 臨饗

禮官述頌 公時為禮部祠祭司郎中賜宴欽賞白金五兩綵段一表裏

前星隱芒耀恤胤厓淵衷 禮官展經義禡祀肇

修崇良辰考乾度靈壇依 震宮北杓指降婁東

井正昏中蒼帷冪神囿絳 炬輝玄穹和鬯揚郁

烈精虔一以通道遥神具 喜登假何豐融瓜酌

兆蕃衍禕禴佩彤弓相維 二三臣奔走咸肅雍

回鑾臨闕殿錫燕瞻 天容玄鳥啓殷緒帝敏
昌姬宗休徵晰在昔瑞應今所同跂觀迓景福
華渚流長虹

無逸殿落成侍燕聽輔臣進講書無逸詩

函風七月各一篇述頌

時爲禮部儀制司員外郎

栢梁聯藻詠華林盛文流但可娛高會未足揚
闕休我 皇秉明睿九德裕兼收在貴不狎邇
旣聖猶敏求離宮匪新築舊貫仍崇修壘霓雲
棟竦天矯虹梁浮華棖映講幄黼辰凝宸旒藉

是集儒彥寧爲清燕謀冲襟佇啓沃元老陳嘉
猷勤民重本業稽古談姬周書詩取同貫稼穡
贊鴻疇石渠未可擬東觀詎能儔瑤瑋珞戢
峩峩冠弁休昔聞鳧藻契今見丹青投緝御授
筵几大庖羅珍羞中庭振朱鷺東序戛天球草
豐零露湛苹甘鳴鹿啣采菽嗣鎬飲浮觴殊洛
遊嘉運信非偶 洪恩安可酬小臣叨法從恍
若登瀛洲秉筆紀盛美惇史垂千秋

冬至日扈從

南郊訖事還御

奉天殿

大宴羣臣述頌

時爲儀制司郎中

昊天眷鴻曆 皇明承景祥
聲教漸四夷 倫制規百王
輶軒通月竈 象譯臻龍荒
玄符契穆清 坤珍宣秘藏
神禽翥阿閣 醴液流中唐
宸心虔大報 秩祀釐舊章
園丘應紫極 靈日兆初陽
萬象荷資始 一元統天綱
虹旃導法駕 周衛儼星行
玉階陳曼擊 金鼎升芬芳
躑躑集彥髦 顒顒奉圭璋
盼蠻歆百神 崇焜燭穹蒼
皇祖夙幽贊 陟降恒帝傍
精白格上下 泰靈淹樂康

回鑾徑芳甸 廣燕開明堂
受釐單戩穀 錫福均履長
龐恩逮庖翟 和氣塞玄黃
百男衍周祚 多壽餘堯慶
臨况兼巨美 徽號垂無疆

覲賀至京作

自貴州兵備僉事入

覲作

矯首望天邑 佳氣搏紫清
巍巍準辰度 恢恢布皇紘
丹霞盤鳳閣 白日劇金莖
四衢朝擊轂 九市夜鳴箏
皇都誠巨麗 况乃逢休禎
渙號若流水 頒政如懸衡
九廟秩禋祀 三雍延上英
瑤階時莫莢 瓊圃敷華平
卓躒摠諸夏 保界陋西

京舊遊慨陳迹盛觀欣新榮攀龍屬嘉運振鷺
儀雲程子牟馳魏闕長孺繼承明自非圭璋美
胡然委琚珎鵜梁詠在昔撫已增屏營

覲賀禮畢辭朝作

明皇膺瑤籙錄寰宇躋春臺祥風扇九有玄澤濡
八垓千秋邁令節萬國膺懷來輝煌耀靈景竊
窳天門開 皇容穆顯若臣度秩欽哉九賓奉
琛賚三揖禮賢才夔龍前儼導鄒枚後紛陪我
冠無寢貌影纓咸俊魁金縣玄圃奏玉露南山

杯展儀儀已肅攄情情亦恢 聖心眷敷錫清
問及蒿萊永疑贊密勿揮霍變雲雷蛩蛩䟽
臣弃置如駑駘良辰夙所冀始願行已灰稽首
謝楓陛沿牒返荒隈短日苦遲暮長路方縈回
金鑑有遺錄闇劣昧其裁中夜起嘆息回首晞
三台

歸自靈山途中寄別送者

一作寄王德仲

引疴謝省闈戀祿臻瀛壖蠻雲煖燦爛瘴草春
芊綿風土旣非偶應接罕所歡傾蓋近時彥披

顏昵周旋周旋雖未幾燕婉已相依疊疊翰墨
好悠悠林壑期舒襟躡陽嶠探幽攬陰蕙已愜
賞心願詎惜頽羲馳頽羲不可留信宿增離憂
抗容理程會瞻途戒盤遊情人眷儔侶飲餞越
林丘並愜意倉悅攬袂語綢繆綢繆旣已分何
能展殷勤潯江東北鷺靈岫西南賁驚濤駕颺
奮奔峭凌烟紛已足消客況矧復懷離羣離羣
積思深含酸末沉吟習習谷風嘆丁丁伐木心
新知樂自昔久要證在今渥惠諒非薄佇子瑤

華音

聞鴈

洞庭生白波蕪葭下寒露棲鴈驚且鳴噉噉雲
間度客心柰爾何彷徨聊四顧盈盈河漢傾寂
寂樓陰注長夜漏已闌崢嶸歲云暮耕稼有餘
休組纓多觸忤長劔不可揮掛壁塵欲污青雲
非我鄉碧山亦懷故何不歸去來廣陌縱長步
明朝覽鏡中短髮渾欲素

曉發富春

東風曙色微征艫乘月驚瀲灩沂江波冥濛亂
洲霧去家寧幾何奄忽變朝暮冉冉越川塗淒
淒抱情愴明發眷嚴慈端居憶冲孺運命信不
辰行藏且狼顧壯齡昧險夷橫厲騁高步投足
輒坎壈省躬覺僣誤猖狂阮籍車濩落魏王瓠
因茲眷田園庶幾完晚素曾是惴惴憂匪以快
快故進止復何如離情繫江樹

俠客篇

俠客意崢嶸翩翩出渭城金羈躍紫燕錦帶垂

青萍修容已自熹家世復雄名豪舉橫穎曲高
貲遷茂陵藏命鄙郭解借友懷荆卿將相延倒
屣京兆禮分庭冠蓋隘邑屋玄黃交篋贏義槩
衆欽聚肯藉唇舌榮晚節慕約敕縫掖從諸生
咕嗶破萬卷鼓吹鏗六經承平法令弛疚哉秉
國成長吏競乾沒盜賊莽縱橫刺史懦自免司
隸昏如盲賞罰天所持誰能假之行義勇著心
本寤標何時平

至日軍中鞠俘閱馘

時爲貴州僉事分巡
思南道征酉陽作

洪鈞關大塗沉陽蠹初復覘管颺葭灰閉關謚
行轂恒懼調燮踈疇云慮囚戮伊余舛前猷攝
戎畧荒服列郡勤飛芻連營矯流鏃尚賴將士
賢鯨鯢屢摧衄犖犖獻羸俘纍纍貫枯髑三捷
敢論功寔悲向隅哭况復值良辰慘愴情愈蹙
聖澤暢八埏萬有藉亭毒柰何此疆隅天施閔
滲漉茂對浹皇慈敬授協民睦月令有遺言潛
然廢陳牘

寄贈黃勉之

西湖遊詠刻凡一十八首今錄五首其二

溟渤長百川攝提紀羣曜玄覽綜古今達人秉
樞要光儀表人倫藻譔華名教尚絅問逾榮粹
茹賢孤邵伊余昉沉冥自牖延靈照抱素寡泛
儔當涂眷高蹈慕蘭神屢交攀嵇懿初紹傾蓋
結綢繆披襟領微妙墳素恣竒搜蓀蘭從夙好
六蔽行已蠲三益誠知樂短札媿李投晤言冀
瓊報

寓大石佛院綠竹北軒

其四

禪關信窈窕飛軒結層岑紅泉瀉靈液綠篠屯

幽陰登樓有高眺窺園亦近尋我友蘊真賞晤
言偕宿欽遊神隘八極歛跡依雙林慮泊求罕
固思玄物詎侵舒嘯撰危策陶和賴孤琴慧日
朗虛牖祥飈襲冲襟遺榮賁高趾親仁息長心
斐亶發衆難鏗鏘列賡吟機忘狎魚鳥道在茂
纓簪

遵王岑山高麗慧因寺由六橋步歸

其六

危岫擁嶇嶽輕裾恣超軼遠眺幽蘊舒近矚麗
景密丹厓均望騁窮玄門瞻儼悉貝牒衍三車珉

經閱隱帙法相覲象龍高談諧于瑟奧奧擬采
披扶光忽飄疾草草風栗留滃滃雲慘慄枉渚
浪西頽環洲棹東尼引屨回徑賒行吟餘賞溢
迢遞陟飛梁徙倚憇石室步雅體仍和神王心
逾逸微尚易為盈良遊難可述

白石屋洞至法相寺

其十

曠志憶逍遙勞歌厭囚窘縱壑媚春鱗薄霄愧
秋隼隘彼方內遊夙此塵外軫每挹山水輝都
使名利盡煙樹杳芊綿雲峯互苞積崖屋已靜

便祗園復恬引金輪相自圓玉鏡光不隕沉照
燭靈根依方獲玄準理會得有死神開暢無朕
雖牽纓組心亦免丘壑晒

循宗鏡閣左登南屏山頂披險西討其十

聊浪已浹辰次第極奧賞潛棲神鬱伊高造性
陶朗磴棧絕寅緣厓館忽躋仰萬壑透雲屯雙
峯對霄上妙覽匝四隅瑋覩集西壤餘霞散浮
絢高飈驟清響陽阜挹春暄陰谷參秋爽已訝
樵徑迷時睇鹿町往景觸咸內任情融非外獎
藉此淑營魂冲襟庶殊曩

崇安閱士乍訖遂偕蔡子木暨諸生同遊

武夷武夷遊詠刻凡十首今錄二首

校文僊甄藻取則慚執柯紛綸五經笥璀璨群
英羅薄乘都授餘喜覲朋好過追隨訪殊境泮
與淹卷阿玄壇邈今古琳宮翳煙蘿鵲盤藝都
梁鸞簧奏雲和吏牘乍置遣儒冠鬱嵯峨妍景
愉幽棕蘭言聽良多鄙吝復何有豁若蠲沉疴

贈子木

名汝楠德清人嘉靖壬辰進士時以員外郎省親同知公于延平

達人思精妙甄陶括緯象山水滌玄襟琅玕振
清響天天春藥舒潑潑秋瀾爽愛子獨步才愧
我一日長樂善豈面諛忘年廼心獎居鄰棗梓
間契託雲霄上北懷箕穎期南結羅浮想但恐
搏扶搖枋榆空悵惘

示藝蘅

貴州時寄所云二親者朝議大夫
方太恭人也母氏者世母費氏也

滇棘信要荒山河絕疆紀登涉浹七旬顛險軫
萬里馳坂掣懸微凌橋援飛藟洞壑屯層雲鬱
蒸蕩涯涘俛瞰所歷高終朝魄三褫炎燠瘁輿

徒負擔爾重趾喟焉休戚同尋情喪寧救覽物
感已多鄉思歛紛委明發懷二親庭闈盼尋咫
歸訊企南鴻來緘覓雙鯉內顧鮮所歡重寄不
在爾爾名良不訾喻義夙有以維蘅抱英芬幽
真匹蘭芷攬結勤昔賢明德馨諸已蒙養首沉
潛聖功謹初始從繩無枉材斥弛匪良士動容
鸞鳳翔靜儀喬岳峙三省研道真百巧黜浮技
幼志棄曩愆令圖覺今是善變魚爲龍不善橘
化枳根株旣已殊臭味詎倍徙大父秉明哲家

綱振弘美定省肅恒儀愉頽承母氏在禮隆一
源所後非異視汝姊歸有期梳栲別嫌似阿妹
纔六齡癡小復喪妣塊處傷笄單戕脾斷瓜李
小叔雖齒齧名行我倫比遜讓太古前趨踣勿
肩儼物情和以諧天道盈有毀世祿猶不支寒
宗焉所恃夙夜慎身修兢翼保福履朝華悲蚤
披頽羲邁暮軌厲志或懸頭惜陰亦拊髀羨墻
覲前修龜鏡括諸史曾是握瑾瑜豈云覲青紫
我用申嘯歌法言間文俚亶亶探由衷拳拳勝

提耳孝理不遐求興言矚橋梓抱袞三復之無

爲漫諾唯

姊者藍田也妹者亭亭也妣者徐恭人妹之嫡母也小叔者季禾公也

丁未之秋周虛岩沈鈞玄自吳中見訪皇

甫百泉以詩寄懷闕爾不報于今三年薄

遊吳中遂偕周沈同訪皇甫因而叙答

憶昔漢東京乃祖秉風節群賢禁錮辰耻不與
黨列流芳千載餘雲孫振高潔二鳳侈前聞吳
中推四傑麗藻曼金徽玄談霏玉屑眇予忝襟
期用世慚蹇拙衡宇翳蒿萊跡屏扉倦閑三徑

引清風二妙忽紆轍萍踪難合弁鴻想阻寥泚
入室嗅芝蘭眉宇覲踈徹新知既已諧舊雅重
陳說之子揆天才長鯨橫海掣貽我大雅篇寡
和等白雪七襄不成章三歲字懷滅德輝信難
韜珠沈水圓折哀哉越石父胡然困縲綫願君
鑒蘭膏剝彩避媒孽世態喜追隨吾道重規切
申衷報短章無異劔首快皇甫名涉字子循長洲人嘉靖己丑進士

渡江

長江浩無涘欲濟仍躊躇眇此一葦輕凌彼萬
頃餘操維荷弗審寧不隨淵魚豈獨九折坂康
莊亦摧車所以大易戒濡貴有衣袂寄語臨川
子慎勿狎靈胥

採蓮曲

江水纔三尺芙蓉漾新碧亭亭立曉風深紅間
長白蘭舟輕往來墜粉何狼籍對此愁佳人良
辰空自惜安得駐朱顏留待遠行客

冬夜宿省中懷應邦材

名大桂仙居人嘉靖丙戌進士

寒月滿空除清霜零碧樹怛怛懷遠憂轉展不

可曙飄忽柰歲何佳人渺何處泠泠渙秋瀾矯
矯孤鳳翥炯炯來夢思忽忽不得語安得凌晨
風奮飛從此去

答葉敬之三索曲

名良佩太平人嘉靖癸未進士

碧樹生庭阿童童若翠葆一夕秋風生零落隨
百草榮瘁信有時紅顏豈常好明鏡將柰何風
霜願自保

橫塘五月初芙蓉香霧濕遊冶兒女情蘭舟何
捷給日出浦煙消日落風浪急長纜將柰何花

嶼莫深入

銀瓶金作鏤奇珍等琛瑞金井汲寒泉泉深瓶
亦墜頃刻不自持千載未沉棄修綆將柰何臨
深慎勿易

野田黃雀行

黃雀秋正驕翹翻起平楚集我墻下菜啄我塲
中黍我黍予所治三時鮮燕處穎粟曾未餐朝
夕供爾汝交交往復來卒歲空予庾我欲訴帝
虞收之以罟罟罟何恢恢嘆息此終窶

大鵬篇

大鵬隘少海乘風欲南圖男兒抱遠志墮地已
懸弧束髮去丘墓負劒遊皇都皇都一何麗九
軌開經涂朱甍聯繡戶曄曄相依扶王侯盛賓
從賢豪起屠酤明經登上相高貲分左符一朝
蒙渥澤三族生膚腴捷足無蹭蹬矩步多趑趄
拙哉骯髒子華顛守枯株

古意

孤蘭生廣圃亦與衆草妍春風信駘蕩雨露誰
能偏猗批幽閑姿卒歲終自憐感物契我心移
置庭堦前臨風三嘆息相對兩茫然

謝陸伯載見規三首

鰲崑山人
辛巳進士

少年頗好道遍入名山遊瓊花與瑤草茫昧不
可求纍纍征途間卒歲誰爲謀路逢王子喬憫
予雙矇眸飲以金七藥居然宿疾瘳願言侍羽
駕一覽八極周霓裳忽高舉嘆息蒼冥浮

漢宮尹婕妤自謂花相似長得君王憐三千失
皓齒豈識傾城姿却在東家里一見邢夫人低

頭羞欲死妍媸固有然區區安足侈
秋風發寒谷策策吹庭柯物色迥非故白日亦
流波人生匪山岳安得久峩峩浮榮易汨沒立
節貴不磨寧沾千載譽媿取天地多登高餘咫
尺失足未蹉跎與君各努力皓首將如何

苦戀

苦戀山澤好何不投朝簪既爲丈夫雄難灰行
義心安能依草木搖落煙霞深世人誇健步擒
虎飛危岑嗟此孱懦姿康莊猶棘林華榮非本
相取舍力自任古來利名窟未有不陸沉

南歸寓普明寺

伏枕一月餘風餐四千里歸厭人事喧靜借祇
園止林深雲不開僧癯疎常倚未暇參禪乘先
須憇勤趾解帶投松床赤腳謝芒履虛牖引輕
風氷盤薦沉李絕勝白旃檀清寒逼脂髓睡起
無人知凭欄看放藥

仰屋嘆

稚子莫力田稗禾同一植幼女莫秉機絲纈同

一織取辦眼前功不顧身後職萬物各有當胡
爲強委逼君看頭白人七十猶童心話言多反
覆變態如浮陰梟鸞無別翼和聲卽同音天閨
不敢叫仰屋聊短吟

雜怨二首

結愛莫割襟分襟能斷親送遠莫刺期愆期多
傷神不涉棄置地豈識離別因唯有庭中槿淹
淹如解人

流火不鑠金飛雲不動石妾有金石心惜無金
石豁鄰女探春歸笑談喧一席我獨守空牀殘
燈伴愁夕

古意

寶鏡淨如水中涵明月光贈君千里道清輝移
洞房一覲孤鸞影應知妾斷腸

艾如張

艾而張羅于彼空谷狡兔斯奔竄首叢樸此鵠
何辜斂翮就戮弗謂何辜爾辜實多揚聲崑崙
樹刷羽瑤池波矯潔世所忌讒人柰爾何

赴貴竹發軔違戀

焚絲治有緒離思攪無端遠役詎云恤違親良
獨難已足灰百念况迺當春闌冥冥風雨交策
策衣裳單別味釀胸臆猥雜辛與酸慈母結襟
襜枯眸淚洄瀾嚴君強顏色吞聲益繁嘆楚水
既渺瀟黔山復嶺岼戰兢簡書役摧絕棗梓歡
前修重遺體折阪回征鞍依方切歸想陳辭款
金鑿量無鴻鵠志終返枋榆安臨岐憚卻顧揮
策如飛翰去住各自愛泯然勝加餐

雞鳴篇

雞鳴何膠膠東方曛欲曙殷殷長樂鐘葱葱未
央樹車馬交九衢簪纓滿朝著寓內屢豐穰雲
中罷飛輪七貴欣夜遊羣賢及春豫曲池決高
都漸臺槩承露茵閣蔽南山香塵暗如霧但惜
青樽空寧知白日暮仲蔚翳蒿萊雄心耻饑附
咄彼蟬冕華疇能顧韋布貴賤各有營寂寞保
貞素

雜興二首

嗜欲浩無涯逐物紛喪已哲人炳幾先知足貪
已弭天道迭盈虧高陵日崩弛冥冥投禍羅疇
能鑒傾軌

寒風振大壑百卉紛蕭疎長夏已如此素秋復
何如四序苦奄忽汨余年歲除端居寡儔侶撫
壯空躊躇

貴竹對雨寄焦學憲

名維章字子晦灌縣人嘉靖丙戌進士

遠道難託跡新羈多怯覓况茲風雨夕四塞山
城昏坐令昭曠懷頽然抱幽存尚冀晤才彥清

談蠲鬱煩高山邈旌節何用展寒暄孤鴻去容
與遐心矯騰騫君心諒無拒跂予竚歸軒時在都勻
感古

壯士不得志鞍馬無光輝屏居藍田側蓬蒿翳
荆扉舊遊已陳跡世局多新機雄劍躍寶鞘時
追狐兔飛

烏蠻灘 廣西時作

百粵信多險茲山復魁岸飛嶸杳峻嶒懸流激
湍泝嘈嘈驚沫紆齒齒玄磯燦征帆卷不舒鼓

世理猶斷臨深絕手援習坎發顛汗已傷千里
心焉假百年觀汜濟暢餘歡回眸未前嘆居易
如有常僥倖非所翫潛然臨長川誰能寫幽瘡
贈東昌陳太守 儒癸未進士

希世非短步規容必新妍迷離昧奔涉濩落成
棄捐忽忽遠京國悠悠越山川潢潦汨修畛衰
林翳平阡烝烝離緒亂惻惻羈思騫徘徊眷儔
侶抑鬱增沉綿訪古道東郡賞心邁時賢傾蓋
亦邂逅含情自變娟舉世忌玉碎君子羞瓦全
信義苟無爽顧頷非所憐慷慨平生志非君誰
與宣

長城歌送齊瑞卿整飭隴右兵備

長城蜿蜒起西極疊格層樓架空碧秦徒百萬
力已單頽壤千年化爲石太華崢嶸天削成黃
河九折龍門傾山川縈抱復如此百二之險誰
能京胡騎當年怯南牧豈知謫戍窺山陵由來
外侮非長顧立國還須先內寧天子垂衣泯聲
色德威震懾陰山驚花門底貢走天闕關西悍

卒何縱橫白晝都城逞睚眦殺人橫道標其名
齊君炯炯雙瞳精英風飄忽王侯輕紫燕雲遶
幾汗馬蒼鷹盤薄凌秋清詔下承明選賢達班
超夙有封侯骨昂然攬轡萬里心坐見長城增
碑兀猛士咆哮慎所監指揮能事如風湍唐家
河北弊姑息至今欲語摧心肝名之鸞桐城人
正德辛未進士
書徐四叔丈示元僧定芝畫竹名衢字亨
之餘杭人
兩山老人雅脫俗萬寶都忘惟愛竹千里遺來
八尺縑習習清風自天日嗟予雙睫飛塵埃披

圖恍惚臨寒谷白石紅泉夾坐隅欲訪林巒舊
茅屋誰歟作者僧定芝二百年來墨色滋想得
禪龕初出定臨風戲寫青瓊枝一葉初開豁煙
霧迥出數幹騰蛟螭迸谷穿雲條有神湘漬潤
曲空嶙峋翠影參差搖素壁風前彷彿聞韶鈞
君看此畫非凡格放筆凌空如植戟山人翫此
生意多籀龍宛露堦前碧碧玉駢頭日已長清
修不逐井梧霜欲待伶倫求鳳管正聲千載諧
虞簧

呂梁遇風

呂梁窄束黃河傾黑風倒擊波崢嶸石齒槎牙
出復沒鯨翻鼉躍相喧爭飛廉觸忤陽侯怒戰
酣日落猶未平盤渦挾舵幾欲折孤舟旋轉如
風箏客心摧折色沮喪歛將骸骨隨浮萍沙頭
田父荷鋤立腳踏實地雙眼瞪茅屋百年可容
膝天外豈有真蓬瀛

送蔣明卿之萬載

名相餘杭人弘治辛酉舉人知縣

乳燕朝飛麥隴平棗花未落槐陰清故人出祖

盧溝道遥遥翠幃牽離情酣歌擊筑凌千古試
決懸河向君吐丈夫榮辱等浮雲世態低昂何
足數十年習靜三峯廬一瓢長對五車書意氣
湘江走東海襟懷黃鵠翔太虛巨闕芙蓉花未
剖神光會見冲牛斗謝氏森森靈運竒吏隱宜
春嫌墨綬萍水西奔垂玉虹錦帆天際逐薰風
秋深紫蓋峯頭月千里西湖入夢中

別贈吳大允祥

名麟孝豐人嘉靖丙戌進士時由御史謫廬陵知縣

唧唧復唧唧出門長太息拔劍安所如古道滿

荆棘憶昔高步凌天衢宛轉青雲弄白榆曳裾
葉葉紫霞綺飛佩珊珊明月珠天子聞名趣召
見三春傳詔重華殿環碧池頭錫宴歸一朝傾
動金門彥世故由來反掌間九天雲雨須臾變
沉淪蚤慕鹿門豪泥塗始羨相如倦別君此去
東復西咫尺相看雙淚垂丈夫不得高樓棲傍
人門戶須俯眉

長歌送張方伯

名峩成都人正德甲戌進士由廣東按察使之福建

炎洲一夜飛寒雨榕葉滿城凝露紫海門白白

故人去明眸雙送秋風裏壯遊憶昔與君時並
勒青驄白玉羈太液池頭看競渡曲江花裏共
題詩峨眉稜層秀骨枯清廟新呈雙玉壺海外
莫愁花萼眼天門早晚歸雙鳧雙鳧雙鳧爾何
之雲路茫茫不得隨南國孤舟悲刺促樽前懷
抱有誰知穗城仙迹那更得但見毒龍翻雲海
水黑山猿離迷跳庭閩陽烏渴吼垂雙翼君今
此去閩中遊借問何如天上頭

元日

奉天殿侍儀退簡同署

時為儀制司郎中

魚鑰通宵啓龍旗拂署懸紫宸臨法駕丹陛擁
群仙獻歲開昌曆貞符協上玄乘春恩似海祝
聖福如川占籍青雲上依光赤日邊鷓鸞慚渥
寵犬馬度虛年陳力匡三禮和衷藉列賢願從
飛珮後長此聽鈞天

南海李給事孺徵晉江張進士莊甫惠安
曾進士英遇同日過訪時漳浦王進士于
行令仁和四君皆門生話舊小集

訪舊逗征橈江亭候早潮當年同拔萃此日總
遷喬車從洵閑雅衡門慰寂寥論文忘漏永對
酒覺春饒桃李輝聯萼鷓鸞集共條虛名慚領
袖乏德媿瓊瑤登俊光吾黨摠忠答 聖朝雲
臺清燕夜應夢到漁樵 李名兆龍張名冕曾名
承芳王名健

史恭甫偕遊王女潭途中奉答 際

希聲振次溲字字憂英瑤昔頌玄真子今聞泰

逸樵 恭甫別號 當年青瑣客謝事紫宸朝雲漢回雙

舄江湖寄一橈避喧情自約選勝興偏饒王女
留仙躅瓊花秀遠條葵心丹向日桃臉醉生潮

雲路逢鸞鶴應隨王子喬

出自省中遂往盧龍觀觀在順天

祛煩離晝省避暑入玄都鳴鶴松間引歸雲嶺
外孤羽童供紫茗虎榻隱青蒲倦展桐君錄貪
看王母符丹爐新伏火藥笥舊藏珠玩月登高
閣凌風羨遠鳧何時訪姑射束髮受冥樞

往昔悼內為先妣徐恭人作

往昔嗟于役尋常定爾思綢繆天與合窈窕意
無私玉案空留篋香纓猶在笥未違同穴願已

負百年期無復人間別祗增地下悲天涯一掬
淚無路灑松枝

飭兵思石群公郊餞別後寄懷有序

頃者治兵東鄙辱餞青郊供帳備尊竿
之娛贈言投瓊玖之好僚情交誼何以
加諸竊念僕幼耽馳騁厭就矩矱羞少
遊以下澤委志偉終軍以長組蜚聲及
乎弱冠旋入檢束雄風豪舉時復萌生
遭遇休明謬取薄宦十年八轉半就儒

官穰苴祗藝圃之談資絃箏匪毛錐之
什伍近以擯斥之末收復舊班捐之險
棘之隅委以戎行之任雖未能專征秉
鉞禮異軍容而亦得校士掄兵恪共武
服是以聞命就列心動神怡况夜郎障
巴蜀之東藩思石抗湖襄之首領且得
翱翔數郡奔走百蠻覽山川之險易第
戈戟之良苦馭勇士之咆哮控勁騎之
橫驚斯亦丈夫之壯觀宦遊之快事也
文焉可達

分別就道聊述短章若夫契濶之懷興
言雲樹繾綣之想甚于渴飢口未易陳
行郡初分節論兵制一隅由來崇武畧端取勝
文儒偉餞傾三署芳筵罄百壺冠裳高會少慷
慨贈言殊落日征驂急迎秋暑氣徂山光浮遠
樹野色淡平蕪臬憲慚仍寵戎行騁令圖酒酣
飛動意談笑控雕弧

登月潭寺東閣

寺在貴州清平衛

流覽披高閣探竒挹秀岑棟雲含宿潤簷木敞
秋陰滴乳滋丹壑飛淙散碧林庭虛朝鹿至潭
黑夜龍沉仙窟窺天近禪扉映雨深遐踪騫鷲
嶺孤嘯振鸞音已躡真如境仍慚大隱心異方
違夙願偶勝愜幽尋

田叔禾小集卷之十二

錢塘田汝成撰

男藝衡私抄

詩

留別王道思

名慎中晉江人嘉靖丙戌進士禮部員外郎

南宮初罷草五嶺獨乘傳淹蹇秋容暮徘徊落
照前子牟空戀闕叔夜合歸田惟有窮途意殷
勤覺爾賢

宜春晚行

日村元集卷十二
候火遠依依山城歷翠微雨來三峽暮人到五
臺稀禽變驚新序雞棲憶故扉暝鴻歸欲盡悵
望寸心違

秋日登南高峯

飛塔中天起清秋騁望來凭欄湖月近倚杖海
雲回窻窳千峯合丹青萬木開猶憐雙足健無
日不登臺

午日雨阻益陽鄭令邀夏民部宴集

羈思傷佳節那堪對雨長主人能慰客高士復
同觴蟻泛溪蒲綠盤行雪妝香物情憐故里慷
慨醉他鄉

瑪瑙山居

高閣迥層氛迢迢積翠分漁歌湖上起梵放谷
中聞終夕惟清籟諸天多白雲儻逢鸞鶴侶從
此便離羣

曉渡湘潭寄懷殷令

利涉依殘月揚舲激素流杜蘭聞兩岸橘柚隱
廻洲魚躍驚歌榜烏啼散戍樓美人看咫尺煙

霧杳難求

將至武陵聞陳約之行部在郡喜而遣報

東觀違鴈侶南臺耀豸冠懸知霜臬靜還似玉
堂寒荒跡開雲雨芳襟結杜蘭餘馨行喜襲促
席肯辭歡約之亦自翰林院編修出爲湖廣按
察司僉事

遲陳子不至而行留贈束

不覲金閨彥空懷玉樹清淹留車馬色寂寞笑
歌情人世苦多別男兒榮立名與君方一面珍
重簡書行

賈誼廟

上書匡漢室投賦感湘纍慷慨經時策淒涼弔
古詞青蠅工點綴白璧易磷緇何代無讒口非
君獨淚垂

寄諸兄弟震夫壽夫中夫文明貞夫季禾
歸鴈連雲度離鴻獨夜愁翻飛悲異侶棲息眷
同遊嶂巘天邊合煙嵐日下浮不堪歌棣萼雙
髻欲迎秋

徐錦衣東園夜燕先歸名天錫魏國之叔

戚里豪華別王孫雅興幽延賓明月夜選勝曲
池秋未罄遺簪樂先懸側弁愁青驪迴紫陌歌
吹隔珠樓

崇壽寺閣晚眺

虛閣晚來凭遙山紫翠凝踈鐘雲外寺孤塔雨
中燈自別金門侶長依竹院僧蕭然無俗慮身
似玉壺冰

山居雜興

用拙人全恕偷閑老未侵油油棲息地拍拍歲

時心對竹真忘肉聽泉或廢琴茅齋鄰古寺共
占白雲深

觀湖南兩廣土兵受犒軍門部勦西山逋

盜

廣東時作寇平公嘗勒銘于石

練卒今何往平蠻藉此曹幾年勤戰伐無地不
焄蒿一舉驚三省終朝碎百牢古來悲玉石節
制更須勞

淨慈寺

紺殿蔚春陰蒼蘿護紫岑池蓮風冉冉臺竹雨

沉沉花遶行廊遠香流別院深樵歌山徑裏時
聽晚松吟

湖上春行

滿目展韶華行遊處處嘉野橋春澗水古寺曉
園花柳浦歌船集煙村酒旆斜三堤紛若市爭
看玉人車

閶門夜

人醉閶門酒舟移許墅煙稀星低屋角新柳接
河塵古刹雲霞外荒臺麋鹿前三吳清絕地幽

况幾盤旋

烏蠻灘

一葉中流下千山兩岸開鼉鼉吹浪轉燕雀受
風迴奔峭迎船出啼猿近客哀從來輕險絕此
涉寸心摧

登樓

貴州時作

江風吹欲盡客淚灑仍懸短景冰霜迫歸心日
夜煎吳門淪碧海蜀道出青天方識登樓意哀
歌憶仲宣

書石阡府地圖

那堪羈旅眼復按夜郎圖地脉元通蜀山情不
向吳市人朝負弩苗女夜吹蘆嵐氣經年結緡
縑畫卻無

提兵過諸葛營有感

武侯經畧地遺壘尚嶙峋絕塞通荆益雄風動
鬼神論兵思往躅敵愾屬茲辰咫尺驚戎馬慚
稱屏翰臣

軍中酬焦學憲過予思南別署有懷見寄

誰道軍中樂徒勞物外吟朔風淒鼓角嘉節罷
登臨草閣依山迥江梅映雪深無由款高駕愁
絕暮雲心

維章

仗劍

仗劍起從軍三邊義氣聞勤王寧論賞獻馘耻
隨群策馬塵關月舉旗卷塞雲歸來變名姓策
笠謝功勳

謁包孝肅公祠

謁廟瞻遺像爲邦仰昔賢惠流河岳在名並日

星懸野老蘋蘩薦蠻歌報賽筵餘波沾漑地一
脉起寒泉

寄潘子仁提學

名恩上海人嘉靖癸未進士特爲廣西提學

與君雖異省百越故全墟隔嶺通雲霧同官奉
簡書高懷那可似吟况近何如潯水東來急能
令雙鯉虛

黃僉憲約登端城北閣歲暮戀歸竟阻勝

覽書此柬謝

名澄南安人嘉靖癸未進士

北閣煙光迥相期渺碧岑孤舟空泊夜高興阻

開襟不爲衝泥慮還牽逼歲心一尊封臘蟻春
日定追尋

三水同陳少叅阻雨

名端甫蘇州人舉人

獨夜懸深雨雙帆滯淺灘野人依岸寂漁火亂
風寒剩有江湖興從教去住寬簾開鷗鳥近細
酌坐更闌

送胡教諭之廣平

爾去廣平中休看嶺外同地因三輔重才近上
都雄花發需春雨人行盡朔風莫言官獨冷吾

道正須崇

玉泉寺

春深僧獨卧山僻鳥稀鳴
泉落階前細池分檻外
清岩花寒未發徑草潤
長生潑潑遊魚樂悠然
見我情

和金太史觀潮

名璐字美之錢塘人嘉靖丙戌進士

瀛嶠鬱崔嵬秋濤應月來
翻風銀海濶赴壑玉山頽
水府千靈送龍宮萬宇開
朗吟追七發枚叔信多材

送鄭知縣改官教授

捫心元不負解綬又何難
世路行知險人情又自安
名因谷口重官並廣文
寒空篋將孤棹虛愁反覆瀾

蒼梧逢程舜敷

名文德永康人嘉靖己丑進士

去年南海上今日兩江中
共是天邊客無煩問轉蓬
山川雖異域桃李亦春風
綽綽行藏存儵然興不窮

吳程二君同入李氏園二首

園在梧州

乘醉欵山扉虛亭坐翠微不禁花灼眼况耐柳
侵衣澗鳥迎人下風泉捲幔飛誰言百越地池
閣弄清輝吳公名珙字汝瑩錢塘人嘉靖癸未
進士程舜敷
萬里萍蓬跡三春頃刻花忍孤高興發空對夕
陽斜避世心誰許探幽意獨賒最憐瀟灑處臨
水玩晴沙

月夜江東之隔浦

名滙進賢人嘉靖丙戌
進士

相對越江潯聞呼不辨音燈開青霧小月出大
堤深誰解招招意空懸脉脉心穗城如有約春

日候鳴琴

哀冲太子挽辭二首

昨夜乾文異飛星繞漢回正愁三極沴忽動少
微哀空佇承華問虛憐博望開宸慈憂不輟晦
朔若爲裁

豈乏長棗術誰投七返丹龍樓臨月寂蜃輅御
風寒秋建高禡祀春荒永太壇微臣思往事灑
淚向天端公爲禮部時舉高禡祀祈應故結及

陂塘渡

四川

匹馬陂塘曉千山瘴霧端哀猿啼月斷孤魅嘯
人寒懸澗欹橋折穿雲故棧盤溪蠻緣樹立驚
迂漢衣冠

寄簡王兵憲

名崇永康人嘉靖己丑進士

裁罷黃門簡來臨赤戟臺先聲威百粵遺草動
三台每惜安南棄空餘節制回炎荒皆帝宇何
日掃重開

聞延綏捷至寄奉唐相公二首

紫塞傳星檄彤廷下虎符飛騰龍廐馬翕習羽

林孤開府雄三畧元戎控八區不須紆廟律方

叔擁皇圖

公名龍字虞佐蘭谿人正德戊辰進士時以尚書總制三邊

天策懸霄迥神兵壓塞雄青羗張掖並赤狄定
襄通光躍旌旗日威騰鼓角風何由陪羽獵結
束引雕弓

馬駙馬宅夜宴

瓊樓明紫甸芸閣上丹青幽入蓬萊苑平臨烏
鵲橋落花迴鳳舞艷曲度鸞簫華月延清宴風
情此夜饒

趙太守同府寮精嚴寺宴集談時事有感
紺殿午沉沉空庭古木陰清尊延勝賞涼雨豁
煩襟旅劍乾坤晚朋簪湖海深感時愁併劇愒
愒未灰心寺在嘉興

過許墅黃公邀登宜民樓別後却寄

樓閣俯關河凭闌望若何郡通賓旅遠城近海
雲多酒綠搖津樹風清引棹歌客愁兼別况流
思滿煙波名宗器閩縣人嘉靖乙未進士

寧海道中

匹馬向江東蕭蕭朔朔風人間生事薄客裏歲
華窮浪跡隨殘雪歸心入斷鴻倚門愁正劇盼
殺白頭翁

石梁瀑布

洞閣探幽處龍宮架石梁飛湍珠瑣瑣懸磴玉
蒼蒼日月開仙界煙霞護上方何時投白社身
世兩相忘

曉渡楊子江

曉渡人猶競臨深我獨驚半江殘月淡兩岸暝

煙橫鐘鼓金山寺旌旗鐵甕城從來天塹地警
備可忘情

過剡溪想天台覽勝有懷梁徐林三文學
望望名山去溪流泛碧桃芒鞋從此試金策更
須操煮石將休粒餐霞待伐毛諒非難脫屣還
念爾同袍

宗上人惠豆豉戲答

醝鹽幽菽子分惠自僧家未下名雖久金山味
更嘉將同玉板笋何似水梭花叅透看平等方

能轉法華

送月松上人遊天目

中峯留幻跡遲爾去傳衣相送臨秋水歸來掩
夕扉杖頭黃葉落溪上白雲飛望松間月還
思靜者依

東園

聞道東園勝亭臺石徑斜曲池深落澗短竹翠
穿沙岸幘鶯啼柳傾壺月度花風埃徒羨爾何
日訪仙家

春日山行二首

古寺寒煙外清尊落照中
石林樵徑滑曲澗板橋通
纓冕終何事浮沉媿此躬
碧山頻悵望迢迢白雲東

幽懷天共遠春水眼增明
淺翠松前酒留連花外鶯
笑談今日事感慨百年情
歸騎煙光暝孤村雙杵聲

贈別

客館論文日京華旅食情
風塵雙鬢短漂泊一燈明
樹影江城碧鐘聲野外清
孤舟今夜月尊酒共誰傾

將進酒

狐塞無傳檄龍城罷遠戎
懷人千里至明月一尊同
淺注琉璃碧深傾琥珀紅
勸君須酪酏良夜莫教空

客中清明有懷震齡泰龍臨汝力諸兄弟
松柏佳城迥遥遥一水陰衣冠詩禮澤尊俎歲時心
此日多情話何人遠滯滛吳山天際隱悵

望起哀吟

上巳日與曹侍御諸公遊飛來峯

解襖屬茲辰登高勝會新湖山原不負魚鳥自
相親人映尊前玉花餘谷口春朋簪宜數盞莫

遣跡成陳

名忬江陵人嘉靖辛丑進士時同遊者七人家君作序刻石峯下玉乳洞

和金太史中秋不見月

璐

漠漠雨兼風華筵蠟炬紅清吟悲蟋蟀踈影暗
梧桐桂闕淒涼掩蘭尊激灑空小樓頻徙倚悵
望亦君同

是夜雨坐四更月華戲簡金太史

璐

皓魄忽披雲遙天綴五紋冰輪金作繪玉練錦
爲文露湛襟初爽香凝酒半醺知君倦深酌良
夜未過分

和金太史十六夜玩月

璐

陰晴殊昨夜高朗獨今宵冉冉河流澹離離桂
影搖有情瞻玉宇無路陟銀橋柝韻砧聲合秋
城倍寂寥

題美人圖

憶昔逢仙媛鶯花爛熳辰香飄金谷夜光映玉樓春舞迭陽和妙歌翻淥水新秣今天上月何處照離人

元宵和嚴季祥

名鳳湖州人弘治辛酉舉人時爲鎮遠知府

寂寞煙花夜何如竹院僧那逢千日酒不對九華燈長劔天邊倚危樓月下憑鄉書明日發歸思隔年興

題畫四首

與黃勉之同作

何處訪青門高人小隱存暖風楊柳渡遲日杏

花村佳境行同賞幽期擬共論春溪探不極疑

是武陵源

爲徐亨之題王叔明畫二真二贗惜今不知落于何所矣

茂樹曉蒼蒼臨川引興長柳堤深卻暑荷嶼淨生香鼓枻心方愜沿洄話未央採菱清韻發隨意棹滄浪

碧石迴溪靜丹楓背日明水容秋總淡山色晚偏清藉草論文暇瞻雲悵別情徘徊林壑冥疊嶂紫煙橫

驄馬鷓鴣裘王孫賞雪遊瓊花飄紫陌玉樹繞

紅樓北里徵名妓東山集勝流捲簾高閣近歌
吹隔林幽

聞鵲

晨起雙靈鵲窺人噪并除迥開孤客悶端憶故
園書盜賊三春後江湖萬里餘經年無一信嗔
爾報常虛

家計二首

家計謀原拙幽居興獨工圖書隨坐卧畜牧任
兒童并李含朝露池蓮受晚風清吟近妻子尊

釀瀉新紅

避竹深開徑牽蘿短結屏捲簾延草色啓戶納
山青花氣蒸人睡溪風吹面醒倚欄聊一眺雙
鷺下蒲汀

題習靜卷

習靜寄林丘逍遙物外遊岩花閒映日窓竹淨
含秋盤谷應同賞桃源不更求何當兼吏隱共
對草堂幽

長沙寄余思孝

名胤緒應城人嘉靖丙戌
進士吏部考功司郎中

田村集卷十二
彈冠華省魏襟期分袂天涯歲月移衡岳雲深
龍卧穩湘潭春盡鴈歸遲煙霞發笑登樓詠畎
畝沈憂覽鏡時沅芷濃蘭搖落遍遠憑煙樹寄
相思

詠斷絃悼內

徐恭人

洞房寶瑟思華年秋夜淒風忽斷絃玉柱已看
零榻畔微音無復媚尊前巴山月落猿聲絕湘
浦雲沈鴈影偏即使鸞膠能續韻寸腸那得更
綿綿

獻弋陽王

帝子聲華夙不常
袞嘉重疊下巖廊
丹青自得山川理
翰墨元分日月光
江右文章新奕葉
河間禮樂舊靈長
何妨乞與連城壁
未夜騰輝照草堂

雨阻桃源喜彭學諭携酒過訪

千山飛雨暗江頭
草閣蛙聲入夜愁
繞院寂寥孤鶴伴
移尊慰藉故人求
高情已發煙霞賞
勝地何妨信宿留
晴旭稍須林壑美
武陵深處覓

漁舟

酬張方伯叙舊見慰

我之福建五月而調雲南

夜郎夢寐驚相見
炎徼煙嵐憶共遊
泛梗百年憐浪跡
傾杯一笑散離愁
滋蘭樹蕙行將晚
蓴脆鱸肥思及秋
賴有故人勤慰藉
遠題尺牘到

河州

夏日憶張總戎山莊

名經桂林人總兵

少陵不惜馬蹄遙
慣向何家第五橋
嬾慢也耽看竹
興殷勤常荷報書
招杯凝琥珀行陰
洞簾

展琅玕下紫霄
拋卷北窓高枕罷
臨風還聽隔

山樵

春日晚起

草堂晚起怯峩冠
相喚鄰翁坐藥闌
乍雨乍晴花氣艷
一談一笑酒杯寬
浮萍護睡鴛鴦暖
芳草翻風蛺蝶寒
病客有愁天亦念
故留春色共君看

西湖遊覽五首

春遊何處最相宜
湖上風光欲暮時
雲嶂曉開

青茵舊柳橋晴浸碧琉璃風傳隔浦銀笙細月
戀平堤寶馬遲我亦浮沉隨里巷獨懸清賞少
人知

蘇堤如帶束湖心羅綺新粧翠碧潯翠幕淺寒
憐草色華筵小簇占花陰凌波人度纖纖玉促
柱箏翻疊疊金月出笙歌歛城市珠樓縹緲綵
雲深

曾作西湖幾月遊况逢仙侶木蘭舟賡詩待月
林間榻把酒臨潮江上樓南宋池臺多勝跡東

吳人物最風流一從桂海驂鸞去零落瓊瑣爛

未收

公自注云昔年與吳縣黃勉之遊湖一月
偕和百首予既去桂林而詩亦散失矣

蒲荇芊芊盡吐芽兩湖凝碧淨無沙煙波窟理
玄真釣書畫船開米老家買賦金空多貰酒登
山屐折爲穿花已拚齒髮于中老別是人間一
歲華

宋家宮殿倚西湖異代蕭條王氣徂輦道秋風
飄落葉寢園春雨灑平蕪登高賦古非能事賞
月憐花揔細娛惟有岳王英魄在蒼蒼宰木向

南孤

朱烏程考滿北上過訪話別

草翳衡門徑不分
軒車忽駐共論文
辭華燦爛驚開帙
書法縱橫醉染裙
威鳳有光依日月
垂龍無路附風雲
淮陰自古多豪傑
秀美如君更出群

名芟桃源人嘉靖丁未進士

聖水岩同賓山虛堂兩上人夜坐時兩上人咸將遠遊兼陳別緒

期襟何處解塵緣
聖水岩頭思渺然
半嶺松筠懸落日
滿城樓閣鎖寒煙
談詩靜對槐陰榻
瀟茗清分石竇泉
錫杖雙飛出雲去
海天秋月向誰圓

送僉憲趙公北上

名維垣未寧人嘉靖壬辰進士

西風策策鴈橫秋
旌節飄颻帝里遊
夢裏幾回鴛鷺省
日邊重見鳳皇樓
乘傳按部清風遠
點筆名山浩詠留
此去玉堂逢舊侶
紫薇花下好

賡酬

夏日懷山陰潘柱史會稽司馬省郎

忽驚紅日牕前起，卻憶幽人幾醉眠。
偃蹇郎官寧白首，伶仃柱史只青氈。
鑑湖畫艇搖搖發，蘭渚清觴泛泛傳。
聖主正勤宵旰想，肯教逐客老江邊。

潘名壯，山陰人。嘉靖癸未進士，司馬名相。會稽人。正德辛巳進士。

孔學使過積善毓慶堂賞牡丹

天香國色擅雙奇，日暖香濃色更滋。
一似素娥開寶靨，何須銀甲弄朱絲。
凭欄曉露重樓玉入，手春風四座卮。
高蓋暫留臨夜發，還看艷影月中垂。

名天胤，汾州人。嘉靖壬辰進士。

答陳約之見寄憐遣夜郎兼抒歸志之作
荆門萬壑樹參天，落日賓鴻去杳然。
忽枉瑤緘存寂寞，翻令客淚益潺湲。
帝城冠蓋三年別，蠻徼雲山兩鎮懸。
共有鑑湖明月興，若爲同上木蘭船。

謁宋理宗御容於集慶寺

江介重開小有天，聲容郁燁似無前。
不聞露布封京觀，謾覩戎冠列細氈。
朔幕已頒登極詔，宰臣猶進福華編。
丹青寂寞山河改，畱伴空王鎮

法筵

與張獻叔登吳山眺江潮叙舊有述

曩予校藝集英髦之子才華冠爾曹三獻可無
知白璧十年何事困青袍短筇看竹琳宮僻長
嘯凌雲鷲嶺高杯酒留君匪滯滯滄江八月正
飛濤

名嘉猷閩縣人嘉靖庚子舉人

曉雪寫懷因寄京國舊友

廣東時作

雨雪霏霏曉漏遲天門忽憶放朝時光凝紫陌
搖銀燭花點朱衣照玉墀此夜枕衾人倦起殊
方牢落歲頻移忍從上死看梅發不向湖南寄
一枝

沈子仲文丘壑玄襟煙霞逸調引棹湖曲

傾蓋草堂相與盤桓匝月賦贈一首

應魁

筆牀茶竈白綸巾倚木吟秋興入神跡混煙霞
元不負機忘魚鳥自相親主盟白社慚非偶領
畧青山賴有人已卜西湖成小隱朝朝橫榻候
清塵

國清寺寄懷葉寅長

良佩

雪霽千山照眼明
竹林幽澗坐深清
僧隨落葉斜陽卧
客傍閒雲小徑行
谷鳥嚶嚶懷舊友
酒船拍拍送殘生
禪機活潑君知不
三隱當年一笑情

登封山塔彌勒化身之地是佛喜飲好笑
半百年華西復東
飛蓬逝水共匆匆
馬卿多病書仍著
蘇晉長齋酒不空
自在三杯依佛法
等閒一笑領春風
隨緣度世當如此
再拜焚香叩此公

遊鴈山岩

海外昔曾聞閻苑
人間今已見蓬萊
金庭玉室誰經眼
鴈蕩龍湫獨舉杯
遠近香泉飛雪下
參差綉壁倚雲開
平生漫有登高癖
此日深慚作賦才

栢渡舟中走筆簡邵司訓

披雲夜磬封山酒
扶醉晨登栢渡船
晚歲煙霞棲海上
故人風月對尊前
他時會晤知何地
一餉留歡抵萬錢
春日肯懷林下老
爲携雪竇滿

豐泉

南明寺覽佛厓月峽仙局諸勝及梁時三層寶閣廢址

雪鴻踪跡法則流一息禪宮百慮休金粟尚瞻
厓畔影銀蟾不見峽中秋祗園亦有丹丘樂羽
駕曾爲玉局遊高閣已灰成浩劫頓憐人世轉
空浮

登天姥山絕頂瞰杭城若孟浙江若帶

青蓮仙客謫塵寰天姥長歌夢裏山何許御風
同鶴到幾時飛珮與雲還扶棗冉冉無多地弱
水盈盈可一灣我亦近觀周越會冥鴻目送到
鄉關

山居雜興五首

深居簡出意如何一任頽垣長薜蘿蠶月閉門
無客到花時對雨有鶯過鑿經欲定名方少琴
譜曾翻雅調多淺碧溪頭閑白鷺近人那復畏
虞羅

澹薄甘餐世味長一區深占水雲鄉斲來園筍

田叔才集十一
三
煙霞色買得溪魚芰藻香涉霧久知慚豹隱臨
風空復羨鷹揚何妨細酌林泉老不逐高陽舊
酒狂

何必金丹問大還好將時日度人間岩前掩卷
雲同懶松下彈碁鶴伴閒喜對清樽邀北海耻
歌白石怨南山莫言散客渾無用曾展風霆震
百蠻

芙蓉窈窕月朦朧草閣遙憐玉殿風曾從龍舟
西苑裏正聞蓮漏百花中珠簾捲霧搖波綠寶

扇開雲射日紅恍向九霄重浪跡卻忘身世一

飄蓬

時公以禮部祠祭司郎中特

旨賜遊西

澗戶岩扃儼未移青山憐我似前時書林舊聚
珠千篋社飯新分雪一匙陰蟻戰來規陣法午
蜂衙罷憶朝儀河清海晏逢休曆剩有豪懷付
酒卮

曉發新昌入天台路寄懷何明府

沃洲南眺海霞明天姥迢迢帶赤城到處溪山
堪挹秀望中雲樹總含情冲天控鶴人非遠擲

地鏗金賦未成一冒垂堂從此去思君不見石

梁橫

名孟倫新會人嘉靖辛丑進士時爲新昌知縣門人

曉發嵯縣將往天台別林朱二少府

平林捲霧喜初晴鳧影雙雙傍客旌嶺海幾年
成契闊剡溪今日更尋盟蒼山落葉稀人跡碧
澗流花遠世情仙境漸深身漸杳只愁歸路五
雲平

蘭亭燕集

茂林修竹古亭幽江左衣冠此勝遊萬壑煙霞

還舊賞一時觴詠總名流塔泉曲曲穿雲下嶺
樹章章背日稠筆妙右軍惟襖帖尋踪擬向墨
池頭

贈徐第之翁

名後餘杭人今年八十五矣

望湖亭迥俯驚湍蒲柳深開闢鴨欄年力自矜
詩草細豪懷不減酒杯寬四時風月長生術三
徑松筠舊歲寒會看朱顏閒裏駐何須更覓九
華丹

嘉興晚發別陳子常

江南春盡落花天，棗柘籠煙水滿田。
野店酒香新雨後，斷橋人渡夕陽邊。
羈懷瀟灑惟歌嘯，世路崎嶇只醉眠。
傾蓋逢君成坐久，片帆乘月下吳川。

寄懷沈仲文 應魁

儁遊觴詠屬西湖，酒聖詩神興不孤。
談笑總宜百載筆，丹青無事更披圖。
榻懸夜雨頻占鵲，棹返秋風苦憶鱸。
便欲從君清泛去，楓橋乘月聽吳趨。

和曹侍御偕楊侍御映江樓觀潮 怵凡二首其二
湖海襟懷獨倚樓，况逢仙侶伴清遊。
越山霧縞簪螺髻，浙水春融漲鴨頭。
祗藉詩篇聊冶思，不緣花鳥解分憂。
報章累牘從元倡，七步才華絕品流。
揚名九澤華陰人嘉靖戊戌成進士

萬民望久寓宜興，詩以招之。
名表鄞縣人 都督

浪跡名山恣遠探，白雲何地可停驂。
鶴迷煙冷張公洞，花落春深玉女潭。
玄酒未醅慚獨酌，丹經初試擬同參。
爭如舊隱西湖曲，五柳毵毵杜

草菴

夏日三司諸公携酒過藥洲外館簡謝

草堂窈窕新開徑二仲幽踪尚未通
花外忽傳三府至林間更喜一尊同
旋翻翠藻牽銀鯽細注瓊漿勸碧筒
天遣藥洲兼吏隱重煩高誼助清風

秋夜送張方伯入閩中

峩

紫薇花下送離居花落秋風動客思
五嶺瘴雲愁此日八閩涼雨憶當時
即看鴻翼歸霄漢且

覓鸞歌到武夷良夜百年那更得一尊
相對轉凄其

病愈入朝

假寐周廬夜未央坐看月色轉長廊
銀河淡淡低鳩鵲玉漏微微出建章
伏枕久拚明主棄倒衣重列紫宸行
迂踈無力能裨國佩玉闌珊媿獨長

龍江送吳士美移守鈞州

名彥山陰人嘉靖癸未進士

蘆荻蕭蕭鳧鴈飛清江石郭重因依
孤舟尚憶

他年別萬死還從去路歸白首丹心憐汝在窮途青眼故人稀量移猶是長沙謫落日哀歌事轉非

送蔣中丞北上

名瑤歸安人弘治己未進士

翠華南狩下蕪城淮海曾聞杖策迎騰有陽春宣帝德更持冰蘂重臺評江濤燕澹青山隱蘄樹玲瓏紫氣清南國若勤明主問好將民瘼疏延英

清遠遇雨

日落驚傳萬壑雷海潮忽帶雨聲來偵陽峽底蒼虬出橫石磯頭白浪開病骨即看蘇遠道愁腸無復寄深杯卻憐戎馬西山老零雨何時奏凱回

曲江芙蓉驛送李儀部稚大之京因懷屠文升王紹甫陳約之王道思四僚長

曲江日日風和雨風雨催人可自由楊柳陌頭秋獨早芙蓉堤上晚添愁即分庾嶺悲行色若到燕臺喜舊遊爲問同袍諸逸俊南宮何以行

清幽李名義壯南海人嘉靖癸未進士王紹甫名汝孝東平人丙戌進士

曉行聞鷓鴣

曾于樂府聽哀音今聽啼音哀更深
簌簌自垂他日淚紛紛都折此時心
蠻花江畔霜初白瘴樹山頭月半沉
倦客已憐行不得又堪疲馬度危岑

王方伯劉少參適至遂同登妙高臺賦簡
高臺獨上不勝情偶遇同心逸興并石局共彈
秋雨淨芒鞋遍踏曉雲輕禪通水月魚龍寂地

擁天人色相明廊廟直須公等在東林吾已訂
深盟王名俊民合州人劉名勳莆田人俱正德甲戌進士

六榕寺

雙鳧遠寄穗城深海鶴山雲共此心不為參禪
依淨社每因看竹過叢林孤懸塔影青霄近亂
落榕陰白晝沉此意直教人自解坐來明月上
高岑

行按肇慶寄送祝堯緒按察湖襄

聞君早晚去三湘留滯無因共祖觴衡岳出雲

將使節漢江浮月近征檣探幽定入龐公里作
賦今登屈子堂他日有情能問訊澧蘭沅芷遲
來芳

名續長洲人正德辛未進士

同藩臬諸公余約中宅賞菊

秋色離離動物華天涯搖落更堪嗟逐臣自耐
黃花笑冷艷偏宜處士家舊插短籬開小徑新
移數種帶寒沙已拚一醉遲明月莫遣清尊近
夜賒

陸子龍寄酒

雲間正杳青鸞信天外俄傳綠蟻封萬里携來
情不淺一尊開處色仍濃暫將瘴海愁煩破宛
向閩門笑語從卻憶虎丘春正好桃花何日嘆
重逢

除夕與吳汝瑩燕集

玘時爲廣東僉事

守歲天涯共一卮盛遊還憶帝京時藏鈎喚酒
高朋滿刻燭揆題小伎隨鄉話自憐今夕未豪
懷惟有故人知明朝客裏逢春色坐對梅花玉
漏遲

寄贈西亭宗尉

名睦 擢河南周藩

十年不醉西亭酒，千里頻傳北鴈書。
麟閣策勳良已矣，兔園抽簡復何如。
評詩榻帖經綸素藝，卓分花智畧餘。
滿地干戈非舊日，王孫何以樵漁

韶州

河戍寒依浦，村氓書掩關。
隔山明野燒，云是小溪蠻。

胡十八

新翻胡十八，急調出西涼。
不入鴟絃細，能隨鵝管長。

新豐

策馬過新豐，丘墟四望同。
不知千古上，何處酒旗風。

春夜曲

夜靜寶香殘，簾開銀燭冷。
照見庭前花，不見歸人影。

宮詞二首

四方章疏下群司日日乾清坐自批欲奏午時
還退卻 龍顏玄默有端倪

西苑新栽萬樹棠鳳輿親採麥風涼養成細繭
顆顆似浴在金盆白玉光 時在儀制舉親蠶禮

龍船時候鳳船移萬歲山邊太液池寤寐進賢
真窈窕名花新選兩三枝 時在儀制奉命選

二人有 旨賞白金五兩
綵段一表裏

解冠雜憶五首

醉裏屠生興更豪論文只頌馬遷高飛揚跋扈

金閨裏遮英雄談眼底曹 文升

晉魏名家不可當鍾王法帖自門墻王郎贈我

千金意未學臨池媿錦囊 汝孝

陳子翩翩鬢太青詩成先誦董娘聽遙聞此日

遊梁宋春閣應閒翡翠屏 約之夫人董氏會稽人侍郎文玉玘女

祠部儀曹數一時也曾潦倒共襟期若教諸少

當場驚捷足還推王道思 慎中

不見西村張戶侯惜花憐月近誰儔南鄰酒伴

應無恙日日溪邊放小舟 名夔字一夔錢塘人湖州守禦所百戶

瀟湘道中憶崇蘭芝茗薰芹諸從子

鴛棹長亭復短亭飄然江漢一浮萍紅顏青鬢
憐諸子高閣春深枕六經

夜郎二首

荒服提封不可稽疆連荆益混東西千山雲雨
來三峽一水舟航下五溪

漢家宮闕俯金臺萬戶千門次第開神木盡輸
廊廟具工師深媿棟梁材

公以採木功欽賞白金十兩綵段一表裏

廣州竹枝詞二首

青樓何日最相思郎去凌江二月時九里十三
拋水惡轉風灘上有靈祠

窄袖青衫白帽巾波羅廟裏賽新春聖童巫姬
村村會疊鼓鳴鑼拜海神

西湖柳枝詞二首

蘇公堤上柳如絲弄雨含煙信有姿可憐枉抱
春消息不受孤山處士知

錢塘士女春可憐年年爭泛木蘭船若教湖柳
開青眼定道紅顏減去年

候藝衡試院未出

嘉靖己酉作

棘闈高鎖雨沉沉漏柝稀聞夜欲深憐汝揮毫
思獨苦萬言都屬濟時心

鴈蕩

丹厓千尺挂晴湍天女裁成五色紈遺下剪刀
雙壁立苔痕深鎖鐵光寒

山有剪刀峯

曉起

年來踪跡越中多水白山青興若何心事日親
江上侶夢魂無復帝城過



